

癸

巳

存

稿

癸巳存稿卷之八

縣俞正燮理初

梁諱戊城

紹興古城隍廟有梁開平時錢武肅作重修牆隍神廟兼奏進封崇福侯記云神爲唐總管龐玉末署梁開平二年歲次武辰謂城爲牆戊爲武者城爲朱誠嫌名戊爲朱茂琳嫌名梁改成汭爲周汭皇城爲皇牆至宋時汴京城外猶沿梁稱州東州西州南州北不言城也韋城相城胙城皆去城字單名縣見魏泰東軒筆錄又搜采異聞錄云梁開平元年司天監上言日辰內戊字請改爲武今北人語多曰武朱溫父名

誠以戊字類誠故司天詔之耳容齋三筆亦云然不知戊自避茂城自避誠也雲谷雜記嘗辨之戊城皆嫌名耳五代諱甚煩瑣而周顯德時有大將軍周景威作十三間樓於汴水上者其名又奇怪也

武定

五代史云天成元年七月騶虞見武定二年頒永昌憲廣都嘉禾合穗通考云武定二年廣都嘉禾合穗史之武定乃是地名此亦采錄者之疏也

玉帶稻

猗覺寮雜記云帶闊狹以道言當用稻字五代史契丹遣北

漢以十二稻玉帶是也鐵圍山叢談云高宗十三年海客得紫雲樓帶金勝大至十二稻老學庵筆記云王荊公所賜玉帶闊十四稻號玉抱肚又云古謂帶爲一腰周武帝賜李賢御十三環金帶一腰其一玉則云一勝唐書李彥芳傳云李靖玉帶十三勝七方六剗勝各附環隋書李穆傳高祖爲隨公穆以十三環金帶遺高祖十三環金帶者天子之服也高祖大悅蓋古制與後制不同

舊五代史

舊五代史輯自永樂大典而以冊府元龜補之底本俱注明嘗以大典史文校冊府元龜多不同知冊府元龜非全用薛

史元注應存也梁紀太半出閩位部王建傳全出僭僞部此其尤多者至五代會要則全采薛史薛史外國列傳二昆明部落其俗椎髻跣足酋長披虎皮下者衣氍于闐其俗好事妖神底本注云八千五百二十占城本地鳥之大者有孔雀注云八千四百三十九牂牁蠻其國法劫盜者三倍還賊殺人者出牛馬三十頭乃得贖死注云五千一百五十籤云昆明占城牂牁僅存數語今仍其舊細檢其文乃是四國有于闐也于闐在會要二十九卷云其俗好事妖神牂牁昆明占城之文在會要三十一卷占城多獸之奇者有犀牛七字耳今薛史刊本目錄已補于闐然不應次於昆明占城之中宜

依會要次序

河北秦州

新五代史殿板晉紀出帝開運二年正月契丹陷秦州三月
庚戌馬全節克秦州甲寅杜威克滿城乙卯克遂城杜重威
傳引兵攻秦州破滿城遂城案秦州屬隴西道時契丹不得
越河越隴越夏而攻秦也馬全節傳則云克秦州虜二千人
降其守將晉廷謙是晉紀杜傳秦州俱應依馬傳改作秦州
舊史晉書出帝紀云開運二年三月甲戌王師克秦州刺史
晉庭謙以城降甲寅杜重威奏收復滿城獲契丹首領并兵
士二千人乙卯杜重威奏收復遂城丙辰奏大軍自遂城卻

癸巳存稿

卷八

三

連筠篴叢書
靈石楊氏藏

退至滿城九月甲寅移泰州理所於滿城縣舊史晉書杜威傳云領大軍下泰州滿城遂城五代會要契丹云開運二年三月杜威等率兵攻契丹之泰州下之均作泰州舊史郡縣志河北道有泰州云泰州唐天成三年三月升奉化軍置治清苑晉開運二年九月移治滿城周廣順二年二月廢州以滿城隸易州新史職方考於五代有之泰州不載而校新史晉紀杜傳者疑於職方淮南泰州遂改爲秦州幸馬傳不誤耳其後遼別於今郭爾羅斯旗地置泰州至金承安二年移于長春縣則又一泰州與淮南州爲三地新舊史晉出帝紀杜威傳及馬全節傳五代會要其由定州攻泰州凡六七見

皆舊史郡縣志之秦州而以秦州改之則一時兵事不可解
又以遼之上京道秦州注之其地在長城外讀者亦不能解
此馬傳及晉紀以克秦州爲馬功舊史馬傳不載秦州事晉
紀杜傳則皆杜功蓋其時杜重威爲副都統都招討使馬爲
副招討使馬僅克清苑其秦州之滿城遂城二屬縣及兵士
二千人則非馬所及歐史深沒杜功而以滿城之二千人移
功於馬殆亦深惡杜重威之爲人而故抑之也

五代漢關西三叛

薛史史宏肇傳云河中永興鳳翔連衡謀叛關輔大擾歐史
云河中鳳翔永興皆反關西用兵人情恐懼以河中李守貞

發兵西據潼關也薛史王章傳云蒲雍岐三鎮叛周太祖等
專事西征及三叛平國有餘積歐史云漢方新造承契丹之
後京師空乏而關西三叛作周太祖用兵西方永興屬關內
道鳳翔屬隴右道俱在關以西河中乃河東道歐史合三叛
言關西於地里不合檢薛史漢書隱帝紀云乾祐二年正月
乙巳朔制西摧三叛北挫諸蕃三年十一月丙戌太后誥四
方多事三叛連衡又云帝自關西平定之後稍生驕逸周書
太祖紀監國敎云三叛連衡四郊多壘廣順元年正月卽位
制討叛渙於河潼張聲援于岐雍纔旋旆於關西尋統兵於
河朔蓋三叛均擾關西若正名之則不得舍河中而稱關西

三叛也薛史周書太祖紀謂世宗云朕攻收河府時見李家十八帝陵園蓋三叛收復以河府爲重故太祖並關西二叛之地於河東歐史則并河東之叛鎮於關西述事稱名同一舛誤洛陽摺紳舊聞記云向中令從周祖入關平三叛岐蒲雍其實周太祖僅平河東於關西二叛但爲漢兵聲援藉見李家十八陵園耳宋史大中祥符四年車駕祀汾陰出潼關渡渭河蓋自汴入潼關北渡蒲津漢攻蒲之道亦當如此

書五代史纂誤後

薛居正所纂梁唐諸史本謂之梁書唐書晉書漢書周書各自爲部其稱五代史者以十志言之檢隋書志亦本名五代

史志以兼梁陳周齊四朝制度并入隋書因謂之隋志薛則五書與十志並行因從志謂之五代史歐陽修則自別名之曰五代史記徐度卻埽編李心傳建炎以來朝野雜記周密齊東野語癸辛雜識並言劉道原子義仲作五代史糾謬朝野雜記又言范季才作五代史記正誤王明清揮塵錄言蜀人吳縝作五代史纂誤蓋劉范吳各爲一書今惟吳書存據陳氏書錄解題以宇文時中刻之其板由吳興入國子監故宋史藝文志惟有吳書實則此書應名五代史記纂誤若用今名似是糾薛史矣歐史盛行不能復改宋末人已有爲之注者揮塵後錄云樓大防處有孟昶與周世宗書姚令威寬

注五代史惜未見此據後錄所言是姚氏注已有成書王明清及見之又以惜無孟昶書語知姚注用裴松之三國志注例也而其書絕未聞癸辛雜志言賈似道欲刊姚氏注戰國策未及入梓而國事異矣故其書不傳然姚氏戰國策正注補注今行於世冀五代史注遺牒容在人間也讀朱氏彝尊曝書亭集知朱氏亦有注亦用裴例或以爲不傳嘉慶癸亥夏在濟南見其手稿卽南監板本來手書籤千七百餘條多碑拓文字又讀王文簡池北偶談云朱檢討言曾於廟市見五代石敬瑭家廟碑梁周翰撰文惜未購之此碑今不知所存云云今檢其手稿亦無此籤甲子秋見彭文勤手注五代

史記傳注十六卷亦用裴例其冬爲此學依姚朱彭例采書裁貼成編不能校寫也朱籤存者已全采惜姚書未見而孟蜀之書已錄爲可喜歐史本有注署其甥徐無黨名其注於新義隱義以一二語抉之甚精到但未整理文詞耳疑歐自注而署徐名者後人譏其淺陋非也吳之纂誤爲校正之書甚有益於歐史宋人乃謂吳有憾於歐作此書是以小人之腹度君子之心矣真能覽歐史者知徐注與此書非後人所能及也嘉慶甲子小除夜書於拜斗殿寓舍

今五代史記補注及序目彭春農知其詳姚石甫不知其事謂劉宮係延蘇州王姓王姓不可向邇云云實則宮係

在浙日以正燮稿本廣延詁經精舍人校對皆茫然及罷
官寓家蘇州又延王君渭校之王君日醉不看書丙子秋
仍以稿本還正燮正燮日食不給不能看書仍還之宮保
而阿鹽使爲寫清本未校也越十年丙戌夏正燮仍以還
宮保而刻於廣東竟無有爲校者其未審處惟自知之他
人未必能察也辛卯正月過揚州宮保病亟矣仍以此書
爲言壬辰夏春農商改訂談何容易是可歎矣癸巳九月
望天津舟中記

指寸

宋史律厯志云崇寧時制樂魏漢津請帝中指寸爲律徑圍

爲容盛取身爲度之義則可云布指知寸則非也大戴布指知寸言平布十指卽是古一尺指廣一寸何休公羊注側手爲膚四寸鄭注投壺四指曰扶四寸鄉射記握素注云刊本一膚皆一指案寸古尺止如此若大人中指中節之長或不止今尺一寸矣且非布義也

書宋史梁顥傳後

宋史梁顥傳言雍熙二年及第景德元年卒年九十二其卒年數可疑也談苑云梁顥八十二作大魁孔平仲乃治平二年進士作談苑去顥時不遠其言已不實檢遜齋間覽云梁顥太素八十二歲狀元及第其謝啟曰白首窮經少伏生之

八歲青雲得路多太公之二年後終秘書監卒年九十餘梁溪漫志云國初有八十魁大廷者其謝啟殆近乎俳蓋八十二之說所據者此啟宋有梁顥謝及第李清照謝綦學士二啟皆無名子何人遊戲作史傳言雍熙二年及第景德元年年九十二則及第時七十三啟語亦不可用也東都事略梁顥傳云卒時年四十二以推顥及第年二十三建炎以來朝野雜記云狀元年三十以下者梁內翰顥年二十三二書所言其數符合容齋四筆黃氏日抄搜采異聞錄並云國史顥以翰林學士知開封府暴疾卒年四十二史臣加以中道天謝之惜所謂國史史臣乃宋之廷臣卽東都事略所采取者

言中道天謝則四十二卒二十三及第無疑就其時廷臣之言此一證也據宋史顥依王禹偁學禹偁咸平四年卒年四十八當雍熙二年禹偁年止三十豈當有七十三八十二之學徒就其所從學言之此又一證也宋史方湛傳云咸平五年湛坐王欽若贓官收湛家貧無物素與梁顥善假顥銀器乃以輸官六年卒年四十一是年顥亦年四十一年輩相若相善也玉壺清話云趙昌言陳象輿董儼胡旦俱少年在樞府梁顥又嘗與趙同幕五人旦夕會飲夜分方歸都人諺曰陳三更梁半夜一作董以顥及第入仕後少年飲讌言之此又一證也顥傳少孤而仕歷丁內艱生母也在及第九任後

又顥子固傳卒於天禧丁巳大禮成後年三十三則長子生於乙酉顥年二十三也子適傳卒於熙寧庚戌年七十則季子生於咸平辛丑顥年三十九也若七十三及第則七十三生長子八十九生季子若八十二及第則八十二生長子九十八生季子不應九十二歲已先卒矣以其家庭實事言之此又一證也八十二大魁之說前人多疑之然無以證其非今舉四證庶可祛惑今史傳云景德元年權知開封府顥美風姿強力少疾閨門雍穆六月暴疾卒年九十二語不相貫知本是年四十二俗工淺陋校寫者改四作九明陳絳金罍子引朝野雜記作顥及第時二十二則年數不合又譏程敏

政引宋史四十四登科不知何宋史知後人讀史多不精矣
范純仁傳

宋史范純仁傳蘇軾發策問爲言者所糾韓維無名罷門下
侍郎補外純仁言蘇軾無罪維盡心國家不可因譖罷官考
證云無名二字有疑案韓維傳維處東省有年有忌之者密
爲讒愬詔分司南京尙書右司王存抗聲簾前曰韓維爲罪
莫知其端臣竊爲朝廷惜宋時授官制詞俱言陟降之由謂
之詞頭卽名也所謂無名者其罪莫知其端制亦不言但與
軾同謫正如明楊繼盛與張經李天寵刑部同承旨耳

岳武穆獄論

岳武穆以紹興十年在河北奉十二金字牌文書班師十一年金人攻淮西之廬州張俊地也十七御札趣應援武穆以長驅京洛擣其虛及以兵至廬兩議請旣而師至廬州金兵退宋高宗以武穆不專進退爲得體則高宗固前已疑之矣其後金人破濠州亦俊分地也武穆救之金兵退武穆與俊在淮俊欲城山陽武穆言當圖恢復柰何爲退保計俊爲之失色是年四月自武勝定國兩軍入爲樞密副使八月罷樞密以武安安國兩節充萬壽觀使奉朝請十月下獄十二月在獄死初張俊盜也就撫立功爲大將與武穆同事惡武穆功名出已上則誣武穆欲棄山陽万俟卨者武穆宜撫荆湖

時湖北轉運判官改提刑者也武穆遇害不能以禮宋鑒唐
五代亂專重文臣自宋以後文臣疾視武臣宋之曹瑋狄青
曲端明之戚繼光李如松毛文龍皆爲當世僞名雅人君子
者所媒孽禹亦欲抑武臣殺武穆以自附于文雅入爲右正
言則倡言諸大將起行伍知利不知義畏死不畏法當示以
逗留之罰因劾武穆受詔逗留不救淮西又欲棄山陽俊禹
旣合以棄地失律坐武穆又合謀誣武穆子雲與張憲虛申
警報圖復兵柄事涉跋扈嫌疑適秦檜欲示威固位故武穆
事不白武穆傳云韓世忠詰檜以實檜曰雲憲書雖不明其
事體莫須有世忠曰莫須有三字何以服天下莫須有者莫

一言也須有一言也檜遲疑之又言有之世忠截其語而合之以詆檜崑俊之妄其後檜惡崑而謫之又惡俊而竄之小人之黨離矣檜死崑相事事反檜獨至議復武穆官崑言金方願和一旦錄故將疑天下心不可天下於是咸知崑實殺武穆檜畏武穆難制故聽俊崑而適符宋高之意宋高通觀大勢不可不和而君父之讎不敢居其名羣臣又內荏色厲多旁觀之論獨一秦檜公任其事宋高謂其樸忠孤立所謂一德格天者也宋高之才十倍於檜和議本自主之欲和議成不俟殺武穆所以殺武穆者非爲和議也正以崑俊言示逗留之罰與跋扈之誅殺之有名可以駕馭諸將又惡其議

迎二帝不專於已故殺之秦檜之忌趙鼎以有爭也武穆無
作相望亦甘心殺之者檜知禹俊與武穆終不能合收拾民
望得二而失一爲無害也今謂檜冀和議之成則宋高以苗
劉之事舉不自信其臣建炎三年五月八月兩致粘罕書自
署康王趙構而稱粘罕爲元帥至不敢別署金宋且言守則
無人奔則無地削去尊號天地之間皆大金之國其已臣金
可知明年十月檜始南來安得以請和稱臣爲檜功罪然而
武穆以紹興十一年十月下獄而和議以十一月成致有兀
朮與書之說兀朮以粘罕例當以書詰康王豈屑與檜書者
且檜方坐武穆以逗留跋扈之罪豈肯予以梗和美名卽有

書亦不以示人人何由知之此宋人惡檜以岳雲莫須有之
書殺武穆而亦造兀朮莫須有之書以報之此人心之至偏
卽人心之至公也夫以宋高之沈驚秦檜之姦深而俱爲万
俟卨張俊所愚張俊際無妄之時而自害其成万俟卨以輕
薄之才而勇任妒賢害能之責秦檜能知宋高有偏安之材
可藉以取富貴而誤殺飛宋高才可兼用秦檜岳飛而誤殺
飛至死無以見君父兄妻棄君臣父子兄弟夫婦四大倫以
負萬世之詬厲也亦獨何心哉

岳武穆軍律

宋史岳飛傳云少豪飲帝戒之曰卿異時到河朔乃可飲遂

絕不飲卒有取民麻一縷以束芻者立斬以徇卒夜宿民開門願納無敢入者軍號凍死不坼屋餓死不虜掠檢章穎岳飛傳亦有之然云建炎四年飛屯宜興夜飲士卒以酒激厲而用之至承州大捷又云尊酒必均及其下酒少則投之以水人各一啜焉又楊再興傳有云紹興二年岳飛入莫邪關第五將韓順夫解鞍脫甲以所虜婦人佐酒再興率眾入其營殺順夫又殺飛弟翻然則岳武穆軍律之嚴整在紹興二年以後初蓋以運用一心而不喜言兵法不可以事證不同致疑古名臣也

碧雲巖題名跋

廣西平樂府富川縣碧雲巖宋人題名云古汴趙善政養民
罷權臨賀郡丞趨八桂以乾道己丑二月十一日止富川十
三日扯邑宰共山張重起伯振丞南城李紳元章警開封石
士強宗周簿舒城阮瀚北海云云警官不見史志或言當是
巡檢宋京師有警巡院聽訟如明兵馬司史志諸州上中下
縣令丞俱從八品從政郎諸州上中下縣簿尉俱從九品迪
功郎一州一縣巡檢則云掌訓治甲兵巡邏州邑擒捕盜賊
事皆以材武使臣充是無定品與州帶巡檢者不同或言當
是鈐轄司都監檢志云縣有戍兵則令兼兵馬都監及監押
都監巡檢俱不當在丞下簿上檢開封府志祥符縣志俱無

石士強名或石守信後武資也宋職官志有防禦團練副使從八品與令丞同階然是州官不當敘縣下此所謂警者蓋當縣武官也宋史兵志六云廣西路賀州二砦注云臨賀富川職官志有鎮砦官無定品則富川有鎮砦官與他縣異五代史周書太祖紀廣順二年七月丁酉詔有令佐之職軍鎮警察之職各守職分專切提撕宋沿周法鎮砦官卽警察也令佐警察各守職分警可與令丞比在簿上也於富川更有徵矣或曰宋自有鎮砦官何因名警曰此修飾文辭也偏檢宋官無所謂郡丞邑宰者亦賀州州判富川縣令修飾文辭之稱郡丞邑宰警同也

金強伸爲警巡使
天興元年三月事

宋景定公田說

宋景定四年公田食貨志云陳堯道曹孝慶虞處張希顏等請依限田議於官民踰限田抽三分之一回買充公田得千萬畝則有六七百萬斛之入可餉軍可免糴可以重楮其意甚善卽古之屯田後之屯衛而收以官田法燕慕容皝載記封裕言魏晉世假官田牛者稅其十六自有牛中分之蓋三國時各都尉所治如此倣民間收租法民間田主與佃各得十之五田主輸公去十之一猶得十四以充公私之用官屯必係官田而後可用此法以贍軍亦不厲民也志云賈似道一意行之浙西六郡回買公田租滿石者二百貫六斗者百

二十貫五千畝以上者價十分銀半分會子二分半官告度牒七分五千畝以下銀半分會子三分半官告度牒六分千畝以下度牒會子各半五百畝以下皆會子是歲田事成每石官給止四十貫而半是告牒民持之不得售案其法本以重楮則會子之給亦權宜之制而雜以告牒又一切予以畝二斗之價而所謂銀半分者據賈似道傳則亦銀關銀關一兩當會子錢三貫亦皆空紙也又買價止二斗而起租七八斗者皆謬以石爲收課負租仍取償田主其厲民至爲纖密又似道傳言畝值千緡者亦給四十緡案不當有畝千緡之田食貨志亦不載此數蓋凡相攻擊者君子小人各務構虛

以相誣此所以不足取信于人而是非終于無定也德祐元年春謝太后詔以公田給還田主令率租戶爲兵時亟未能施行其所入元時承之不改大德三年閏復因星變上書言江南公田租太重請減以貸貧民明洪武十三年建文二年宣德五年遞減之而租仍視他處爲重明人謂是洪武惡浙西人爲張王守特重其賦乃傳譌洪武初亦知浙西賦重以張士誠恃富未遑加恤則有之也

金海陵采石之敗

金史移刺子敬傳云宋人自來浮詞相欺來書言海陵敗于采石大軍北歸案兵不襲俾全師而還海陵未嘗敗于采石

其譌詐多此類也案海陵紀云上駐軍江北遣阿鄰先渡江至南岸失利上還和州是敗于采石也又見佞倖李通傳尤詳云海陵使阿鄰阿撒先濟兩舟先逼南岸水淺不得進與宋兵相對射者久之兩舟矢盡遂爲所獲亡一猛安軍士百人海陵遂還和州卽宋史虞允文傳所云抵南岸者七十艘皆平沈者也然云明日又於北岸楊林口焚其舟三百則金人所不悉矣

石抹

金史百三石抹仲溫考證云臣浩案元史石抹在遼爲述律氏號稱后族遼亡遂譌述律爲石抹氏案其語見元史石抹

也先傳其文作述律作石抹實卽舒穆魯也然金史九十一有石抹卞傳石抹榮傳此考證不應在百三

夏遵頊

金史夏國傳云安全薨族子遵頊立遵頊立在安全薨前一月衛紹王無實錄不知其故又云遵頊子德旺死嗣立者史失其名案宋史夏國傳安全有子曰承禎而齊王子遵頊立亦不言其故蓋遵頊不以其道得之今不能實知也德旺死清平郡王子覲立據宋史言兼采夏國樞要等書宋金史皆脫脫修纂修者各稽討編撰不相關知也

金記缺改字

金史金卽康傳云宣宗問卽康曰賈鉉言太宗諱單作成字不當缺點畫睿宗諱改作崇然下有本字全體當依蘭亭帖下示作未充字合缺點畫如統旁之充不合缺卽康擬以熙宗諱從面從且睿宗諱上字從末下字從世世宗諱從糸顯宗諱正犯字止作斜畫至沈毓各從口兌說各從本傳讀之驟不解蓋賈說充當作允允上當有顯宗廟諱四字孫說下字從世當云從卉字各有形式以一切書之不能解矣太宗誠字缺筆單成則不煩缺熙宗亶本從面從旦而改作面與且今人俗別猶沿之顯宗允上吕字楷作厶初缺筆後改從口其單字從口似兄則斜畫作允也睿宗之宗增作崇以有

全字在故下示改作未世則以三十作卉其世宗雍則改乡爲糸作羅狀蓋以文記字取難宋史禮志廟諱云嘉定十三年岳珂言欽宗舊諱二字一從畝從旦一從火從亘記字當如彼也

趙孟桂事

癸辛雜職後集云宋乙亥歲國事將危忽傳當塗孟之縉妻趙氏孟桂見爲伯顏丞相次妻者朝廷以太后命遺以金帛俾贊和議得其回奏又復賜以手詔繼而寂然孟桂乃趙忠惠與憲之妹亂後爲尼於湖州廣福寺改名子桂無爲伯顏次妻之事蓋姦人造爲此說騙脫金帛朝廷問探不明耳案

天文志而厯志云法不復傳檢明太祖御製文集壬戌十二月有授翰林編修馬沙亦黑馬哈麻敕云大將入元都得秘藏之書數十百冊中國無解其文者云云明史厯志亦云回回法默納狄國王馬哈麻所作洪武初得其書於元都十五年太祖謂西域推測天象取精其五星緯度又中國所無命翰林李翀吳伯宗同回回大師馬沙亦黑等譯其書多脫悞習其術者如唐順之陳瓊袁黃輩所著論又自成一家言以故翻譯之本不行於世藝術傳云周述學撰大統萬年二法通議以補歷代之所未及是萬年本法嘉靖時尙在又案陶宗儀輟耕錄云耶律文正於星厯筮卜雜筭內筭音律儒釋

異國之書無不通究嘗言西域憲五星密於中國乃作麻荅把憲蓋回回憲名也是回回法本有漢書明初人不知之明初譯出漢書則在元史既成之後先是耶律文正麻荅把法增益庚午元法萬年法而爲授時法所本作元史者謂萬年不傳豈有庚午元法尙在萬年器存法反不傳蓋史遺漏多矣

海運

元得江浙由河漕於大都至元十九年以其勞費丞相巴延以前平江南時命張瑄朱清由海道送圖籍海運可行命上海總管羅璧朱清張瑄等以平底船六十運糧四萬六千石

逾年達直沽時猶兼河漕也二十四年立行泉府司掌海運
二十八年立都漕運萬戶府二領千戶百戶等督運至大四
年乃專用海運其道初自平江劉家港入海由通州海門縣
黃連沙頭萬里長灘開洋沿山嶼行抵鹽城歷西海州海寧
府東海縣密州膠州界放靈山洋投東北多淺沙行月餘始
抵成山後改由劉家港開洋至掌腳沙轉沙嘴至三沙洋子
江過扁擔沙大洪又過萬里長灘放大洋至青水洋又經黑
水洋至成山過劉島至之罘沙門二島放萊州大洋抵界河
口至元三十年千戶殷明略開新道從劉家港入海至崇明
州三沙放洋向東行入黑水大洋取成山轉西至劉家島又

癸巳存稿

卷八

五

靈石楊氏葉

至登州沙門島入萊州大洋入界河於道取便在徑趨黑水洋也時春夏二運爲米三百餘萬石船壞棄米則責償於官人船俱溺者免償明永樂時會通河成罷海運

國朝康熙四十二年大臣錢齊保葉舒往天津截漕九萬石由海運登萊青三府平糶嘉慶九年正月浙江巡撫議奏海運不敢輕試十五年四月江蘇巡撫議奏海運不便道光六年用殷明略道官僱沙船二運抵天津百五十萬石七年又行之其後崇明海口淤小凡船大者俱南由上海

崇明以南洋深以北至天津多沙故用沙船底平也巴延初用平底船六十是也

荅葛君宗昶書

詢及明陵增土十三擔有無取義今會典不書人名之故此
事相沿已久不可復議其源流則不可不知也明制藉田九
十六畝有奇親耕一畝三分築太社壇合天下土十三萬觔
陵寢牆一百四十三丈清明上陵增土十三擔以其時十三
省一千三百餘城也乾隆三年禮臣議以康熙三年用明制
清明增土十三擔明制並無取義今請增土一擔此禮臣一
時未檢之言然十三擔實不如一擔也會典始於明蓋合唐
五代宋會要元大典典章而名之曾見三部宏治十五年會
典例云臣下所奏則書曰奏准曰議准曰奏定曰議定正德

四年表上刊本云制異典墳宜於今而不泥於古法殊紀傳敘其事而不錄其名此會典之異於會要典章爲明人創例也嘉靖重修萬厯重修皆因之推原其意事瑣時近策之得者爭欲附名其失策當載者又競求隱諱不書名誠善法爲元以前人思慮所未及然諭旨與序事中人名何可刪乎儻執筆者心知其意無改成書之大例則書完可存異議亦息矣乙丑四月二十四日

明倫大典

明世宗之奉興王也其言曰在藩邸時奉詔繼大統未奉詔繼孝宗後此言雖智者不能與之辨也然喪服斬衰章爲人

後者傳曰受重者必以尊服服之齊衰三年章爲人後者爲其父母報傳曰尊者尊統上卑者尊統下大宗者尊之統也則繼大統卽是繼後世宗爲武宗後應以尊服之今云繼大統而興王祐杭入太廟是大統亂矣嘉靖十四年正月武宗孝靖毅皇后夏氏崩本世宗君母也當爲臣子服案晉崇德太后褚氏崩於孝武爲從嫂或疑其服徐藻以爲夫屬父道者妻皆母道豈可敬之以君道而服廢於本親其言是也至宋太宗始爲殘忍之事置大禮不問使開寶皇后終於公主家而斂於佛廟其時承五代亂臣民習見悖逆謂太宗待太祖后禮隆於諸亡國后以爲是亦足矣太宗固不必出一說

以文飾之也南宋高宗率羣臣遙拜欽宗禮也中丞廖剛者請刪此禮文曰兄爲君則君之已爲君則兄之可也其言悖逆無禮夫始爲之弟後爲之君則兄之可也始爲之臣後繼其統而爲君則君臣之義在豈得僅視之爲兄而棄君臣之大倫使人心盡喪乎明世宗不爲君母服至託言叔嫂無服是君臣大倫亂矣且爲後古禮不名爲子者以有弟後有從孫後且有以兄後者故名之曰爲後而後統可不絕喪服斬衰傳爲所後之祖父母妻妻之父母昆弟昆弟之子若子喪服記爲人後者於兄弟降一等報於所爲後兄弟之子若子此兩言若子則不正名爲子然言若子則所後之妻若母也

所後之父母若祖父母也若前爲之臣則當以君服服之嘉靖二十年孝宗孝康敬皇后張氏崩亦世宗君母也其稱皇伯母所謂自制禮也其說則自相反初議興王妃稱皇叔母世宗言稱叔母當以君臣禮見然則君母孝康稱伯母君母孝靖稱嫂反使以妾禮見乎禮志不能詳其沿革今案大明會典七十四云國初箋表若天子之姪稱皇后曰伯母皇后殿下叔母皇后殿下至嘉靖間始令各王府進賀表箋但用聖號不許用家人禮然則嘉靖以前叔母皇后是君禮非妾禮世宗自以肌改之而稱孝康爲伯母稱孝靖爲嫂以君母爲臣妾至不爲君母服如易代者然人而不仁如禮何也

張中

明史方伎張中傳云南昌被圍太祖問何日當解曰七月丙戌報至乃乙酉蓋術官筭麻是月差一日實在丙戌也其占驗奇中多若此此所謂鐵冠道人者也其事反復推之皆謬若云初一初二可云差一日今排甲子安得云差一日又實乙酉而名丙戌可云是月差一日今實丙戌而仍名乙酉當云是月先複一日不得反云差一日蓋明時淺人傳聞記載之誤明史稿及明史俱未致思而漫錄之

正德禁殺豬

傳維鱗明書武宗紀云正德十四年九月上次保定禁民間

畜豬著爲令十一月住清江浦十二月辛酉住揚州乙酉渡江十五年在南京四月弛豬禁毛奇齡武宗外紀云正德十四年十二月至揚州所至禁民間畜豬數百里內屠殺殆盡田家有產者悉投諸水是歲凡祀牲有司輒以羊代之其事甚奇又毛外紀以九月爲十二月檢明沈德符野獲編云正德十四年十二月行在兵部左侍郎王憲鈔奉欽差總督軍務威武大將軍總兵官後軍都督府太師鎮國公鈞帖照得宰豬常事但當爵本命又姓字異音同況食之隨生瘡疾深爲未便爲此諭豕牲不許喂養及易賣宰殺如若故違本犯并當房妻小發極邊永遠充軍其事如此蓋九月在保定發

鈞帖十二月又在揚州鈔奉示諭南方始知之沈毛乃南人記載也沈謂宋徽宗以壬戌生亦禁殺犬而黃光昇昭代典則云豬音同國姓且信佛法也各處城市鄉邨居民所養豬口盡減價賤售小豬埋棄蓋速殺賤賣其云信佛法則何不廣言牛羊雞犬武宗通梵語其豹房實多回人又未有尤嗣孫真人千金方言豬肉久食令人少子食忌云豬腦食之損男子陽道臨房不能行事蓋武宗有所感回人慙思之託之國姓朱武宗亥生故有此鈞帖回人不欲見扈從者持豬肉鈞帖止行一路外紀言數百里內爲當時事實鈞帖不行刑部內閣明書言著爲令非也

釋社

日知錄謂社是盜賊之稱明學士稱同社不知其意其論甚
快今案社歇後語也祭社會飲謂之社會同社者同會也古
有蓮社直齋書錄解題有孫覺春秋經社要義六卷宋史孫
覺傳云胡瑗弟子千數別其老成者爲經社吳自牧夢梁錄
云文士有西湖詩社武士有射弓蹋弩社又有諸集社名曰
元有白蓮社月泉詩社明復社多八股語錄幾社多奇士偉
人我

朝順治九年禮部頒天下學校臥碑第八條云禁立盟結社
十七年正月又以給事中楊雍建言禁妄立社名及投刺稱

同社同盟則以八股牟利假借社名也十六年例則士習不
端結社訂盟者黜革康熙二十五年查革社學雍正三年定
例拏究皆非社而冒稱社俗之敝士通文曰詞壇曰吟壇亦
社壇也若在官者養則有社倉教則有社學明重修會典卷
七十六學校一事例云洪武八年詔有司立社學十六年詔
有司不得干與民間社學正統元年詔社學俊秀向學者許
補儒學生員春明夢餘錄府學云萬厯初改提督學校官敕
諭凡提督去處卽令有司每鄉每里俱立社學年一考校仍
免爲師之人徭役明史選舉志云社學自洪武八年延師以
教民間子弟兼讀御製大誥及本朝律令正統時許補儒學

生員宏治十七年令各府州縣建立社學選擇明師民間幼童十五以下者送入讀書講習冠婚喪祭之禮寢不舉行我朝順治九年雍正元年乾隆二年皆官立社學則實社中之學也學生有五等學生亦曰廩生一也增廣生二也附學生三也青衣附學生四也社學俊秀生五也今學政寬無青衣俊秀未入學者皆結銜俊秀凡社學皆稱義學

立後承廕

明時內監廕襲若王振劉瑾魏忠賢其姪孫等名皆眾知之蓋以人惡之詳記其敗耳實則漢唐皆如此後漢書順帝紀云陽嘉四年初聽中官得以養子爲後世襲封爵唐李中敏

判仇士良子請廕狀云開府上階誠宜廕子內謁者監何由有兒遂駁其事此乃士人強壓小人欺其愚很而不知辨內監實有子如楊志廉子欽義孫元翼元价元實曾孫復恭皆非養子也推原古事無子者可以立後但不當使內監廣援爲例王羲之有問蜀都帖云楊子雲有後否沈作喆寓簡以爲似誤問亦不知是立後也又宋林氏有稱逋後者逋不言有子人多譏之時有林洪者字可山著書名山家清供中稱先人和靖先生種梅着鶴圖說稱七世祖逋無名子詩云可山認作孤山種恐是瓜皮搭李皮又施樞有讀林可山西湖衣鉢詩云只道梅花全屬我不知和靖有仍孫亦譏之也今

思其說有二一是同姓先哲楊修言我家子雲不必祖孫林逋有兄子進士宥宥子知蘄州大年實一家也一是立後禮所謂爲人後是也而人獨與林洪競者檢瀛奎律髓注云謁客干求一二要路之書謂之闊匾錢塘湖山此曹什伯爲羣如林可山洪口吻可厭梅礪詩話云泉南林洪刊大雅復古集無名子嘲之然則洪自品下譏之者亦欺其愚很而不知辨非謂林逋不可有後也

于謙獄論

張夏雒閩源流錄注云萬厯甲辰九日東林會講克伐怨欲章劉念臺尙論古人微不滿於薛文清瑄曰于忠肅臨刑文

清時在內閣于初擬極刑因文清言擬斬所以文清不久去位止此事已不能安其位矣會中人因曰此會可以千秋黃宗羲明儒學案師說云于肅愍獄係當朝第一案功罪是非而先生僅請從末減坐視忠良之死而不救而先生亦已愧不自得崔銑松窗寤言則云于忠肅有社稷之功其受害也先生固爭之矣使爭不得卽以此事去尤爲光明俊偉謹案于謙被害主之有人謙被執後薛瑄始入閣位非首輔次輔而諸儒生私議必以于謙事責之薛瑄是謙罪名之定必當於此求之檢閱禹錫薛先生行狀李賢薛文清公神道碑均不涉于公事惟再述王文陷薛欲致之死核其時事英宗正

統九年陳循入閣十年高穀入閣景帝景泰三年增閣臣陳
循舉蕭維禎而高穀舉王文太監王誠助之景帝用文八年
正月英宗復位薛瑄入閣都御史蕭維禎文致獄辭坐王文
于謙謀逆陵遲示天下是年改天順元年其六月瑄致仕天
順八年瑄卒其事如此當此時姦人謂不以王文于謙爲謀
逆則英宗復位爲無名蕭維禎實主刑獄因緣復位事殺王
文王誠以泄己不入閣之憤因以及謙人亦疑瑄爲大理少
卿時辨冤獄文長御史附王振處瑄以斬罪瑄此時亦處文
斬罪因以及謙而不虞其卽決也今推王文獄詞謂召襄王
當有金牌謙則笑言石亨輩意如此不知詔言欲召襄王但

有謀耳不必金牌爲證且金牌時實不見事後始得之詳見
陸容菽園雜記及明史襄王傳文之獄詞適以自證謀召襄
王然則謙之罪由王文辨成之蕭維禎比附之薛瑄減之也
會訊時尹直瑣綴錄雷禮國朝列卿記言尹閔出位拳踢于
謙呼爲姦臣張軌徐有貞又意主殺謙石亨蕭有禎從而和
之其時兇兇藉藉然張鼎楊鶴薛文清年譜云天順元年正
月二十二日同列皆衣紫將刑于王先生曰此事人所共知
各有子孫乃減陵遲一等明史薛瑄傳云亨議以磔瑄力言
之二日減一等野獲編云刑官奏上二日得旨于謙王文從
輕決了去其手足罷明儒學案云先生謂同列曰此事人所

共知各有子孫石亨奮然曰事已定不必多言先生見上言復登寶位天也今三陽發生不可用重刑詔減一等先生退而歎曰殺人以爲功仁者不爲也蓋瑄救謙之力竭矣至六月猶以謙黨殺蔣琳至滅范廣家明史邱濬傳云修英宗實錄有言于謙之死當以不軌書者濬斥之則英宗時議論可知瑄亦不幸當其時入閣也

癸巳存稿卷之八

癸巳存稿卷之九

彭俞正燮理初

御史差

順治時用部主事中書舍人行人評事博士假御史銜巡按
七年裁後又添差十年鄭親王濟爾哈朗請罷巡按御史十
八年六月刑部咨會各省巡察事竣各直省巡按事務交付
巡撫又巡漕御史始順治十四年中停止又設道光二年冬
停止其巡鹽御史則先改差京員曰鹽政提學御史與提學
道改差京員曰學政巡察東三省改差 盛京侍郎巡臺御
史臺灣道帶按察使銜

御史道

舊例御史七品雍正七年改給事中正五品御史由翰林郎中員外郎補者正五品由主事中書行人大理寺評事太常寺博士行取知縣補者正六品乾隆二十八年定御史爲從五品以編修檢討郎中員外郎四項人員補授舊制六科屬通政司登聞院屬都察院以一御史一給事監之雍正時改隸如今制舊例布政司參政道三品按察司副使道四品布政司參議道按察司僉事道五品順天奉天府尹正三品外知府正四品乾隆二十八年去道兼銜定爲正四品外府知府爲從四品

門符

雍正四年作陽文符三藏 大內陰文符三二 交步軍統領
一正陽門一西直門

城外坊

乾隆三十一年定四城副指揮移駐城外

查痘章京

國初有查痘章京理旗人痘疹及內城民人痘疹遷移之政
令久之事乃定康熙時俄羅斯遣人至中國學痘醫由撒納
特衙門移會理藩院衙門在京城肄業西洋地氣寒其出洋
貿易回國者官閱其人有痘發則俟平復而後使之入蓋其

氣始於南洋今徧及也伏讀

聖祖仁皇帝御製文集康熙六十年

諭今王大臣等爲朕御極六十年奏請慶賀行禮欽惟

世祖章皇帝因朕幼年時未經出痘令保母護視於紫禁城外

父母膝下未得一日承歡此朕六十年來抱歉之處

孝陵告祭文云伏念臣昔在沖齡時防出痘遂依保母居於禁外

父母膝下未承一日之歡此臣六十年來深疚負歉者也故正月初七日二月十一日因念忌辰之前慶賀皆不敢受

聖製文如右今

西華門外福佑寺坊書澤流九有傳爲兩神廟實梵宇也後殿供奉

神牌書

聖祖仁皇大成功德佛九字背面書

聖製五律一首其寺本爲當日保姆護

御之邸見恩福堂筆記當由內府記載與

聖製禁外文合又讀

欽定日下舊聞考福佑寺在西華門北街東謹案稱前殿爲慧鑑朗照正殿中奉

癸巳存稿

卷九

三

靈石楊氏葉

神牌東案陳設

御製文集西設

寶座殿額爲

慈容儼在而不記其所由賴恩福堂筆記知之又生身內外
札薩克王公未出痘者亦不至京城也

樂部

初制教坊司有奉鑾其屬左右韶舞司樂共四人協同官十
人俳長無定員雍正時改和聲署禮部內務府太常鴻臚皆
領之今太常協律郎五人司樂二十三人有神樂觀提舉神
樂署署正署丞官太常樂員本取多乾隆七年汰之始

命王大臣總領樂部王一人尙書一人侍郎二人皆兼官也
其神樂署隸太常和聲署隸禮部及內務府編樂亦隸之什
榜處蒙古樂舞則隸侍衛處其中和樂處太監八十二人則
隸內務府掌儀司祭

先蠶樂乾隆七年作祈雨報雨樂章乾隆十八年作祈雨報
享月律乾隆五十一年增祈晴報晴樂章嘉慶十二年作凡
樂名梁以雅北齊隋以夏唐以和宋以安金以寧元郊社以
成宗廟以寧明以和

本朝以平

翰林官

癸巳存稿

卷九

四

通鑑纂要
卷之九
楊氏集

孝陵碑言

世祖於景運門內建直房令翰林官入宿備顧問順治十七年也康熙十六年十月

聖祖始設南書房以侍讀學士張英序班高士奇州同勵杜訥入直後高授侍講勵授編修三十三年五月

命翰林院詹事府國子監官日以四人至

南書房承直其後專用翰林嘉慶年間用趙秉冲廕生也雍正元年設翰林司官定稿說堂今辦事翰林也五年督學部郎以出身原甲第兼編修檢討銜乾隆二年修撰編修檢討俱掛數珠二十二年裁司經局正字五十年裁滿洲侍讀學

士侍講學士二缺侍讀二缺大考補授難其人也五十四年
裁詹事府官兼翰林衛

館閣病假

夢溪筆談言宋館閣每夜輪官一人直宿有故則豁宿例於
宿歷名位下書腹肚不安免宿故館閣宿歷相傳謂之害肚
歷其具文可笑也庶常館請假向俱請病假以翰林省親例
須食俸六年後也嘉慶十五年六月己酉庶吉士多具病呈
上疑之大臣以實對乃定制不拘論歷俸其省親及資斧不
給回籍措費者據實呈明除去往返程途定限在家居住四
個月起咨銷假

武殿試

武殿試始明崇禎四年

本朝因之康熙三十二年四月壬辰

諭武鄉會試舊例以八十步爲則後改五十步中二箭爲合式殿試射的亦改爲五十步嘉慶十二年

皇上以武鄉試會試內場非眞能自作徒爲樊藪

命大臣會議裁內場文論但默寫

聖諭廣訓及武經至旗員不識漢字者不得保舉綠營綠營人員應略曉文案至專閫大員尤宜明曉屢訓飭之

武階

康熙四十八年十月丙午

聖祖諭曰故抑武人是明代陋習武人粗鹵不宜抑之太甚
凡治天下之道當以和平爲貴也乾隆五十一年七月初十
日

高宗以文臣十八階武臣止七品又自從一至正七止十二
階初武正從一品俱封榮祿大夫合爲一階正二至從五俱
封將軍嗣俱改爲大夫乃

欽定武職十八階正一至從二封將軍正三至從九分別都
尉騎尉校尉其加級降級俱以正從各計

墨爾根王府

墨爾根王爲睿親王爲攝政王當時稱爲台星可汗九王見毛奇齡後鑒錄順治七年十二月二十日至八年二月二十日尊稱成宗義皇帝見各書記載其後撤爵封今世襲墨爾根王府在東單牌樓石大人衚衕乾隆時所立也其舊府據恩福堂筆記在東安門內之南明時南城今瑪哈噶喇廟按日下舊聞考普度寺在裏新庫北謹案稱睿親王府康熙三十三年建瑪哈噶喇廟乾隆四十一年始名普度寺本明南城舊宮今寺左黑佛殿內藏鎧甲弓矢睿親王舊物也王以順治七年十二月初九日薨於喀喇城十七日柩至京入府治喪吳偉業讀史偶述詩云松林路轉御河行寂寂空垣宿

鳥驚七載金滕歸掌握百僚車馬會南城其地趾俱合蓋撤封以其女及養子家產人口給信王以後詩故曰空垣也

延恩侯

雍正二年十月封朱之璉一等侯世襲人丁入正白旗明代王裔或作遼王裔誤雍正元年九月乙酉

上諭云近於

聖祖仁皇帝書笥內檢得未經頒發

上諭一道欽此雍正五年

世宗憲皇帝御製

景陵聖德神功碑云前後南巡親祭明孝陵者三又欲封其

後裔俾承世祀予小子祇奉遺言錫之侯爵乾隆十四年八月世襲定名一等延恩侯

史記孔子世家後識語

孔子卒後六世孫斌爲魏文侯相漢高祖時孔子十世孫蒧以戰功封蓼侯十二年高祖幸闕里以太牢祀孔子諸侯卿相至者先謁後從政封孔騰爲奉祠君蓼侯蒧傳至璜失侯璜弟茂之子宣爲長安君宣帝元康四年詔復其家元帝初元元年孔霸得封關內侯爵名曰褒成侯永光元年詔褒成侯以所食邑八百戶祠孔子先是初元元年匡衡請封孔子後爲殷後不納成帝永始三年梅福復請以孔氏爲殷後謂

仲尼之廟不出闕里孔氏子孫不免編戶以聖人而歆匹夫
之祀非皇天之意亦不納至綏和元年二月甲子封孔吉爲
殷紹嘉侯食千六百七十戶尋進爵公地百里吉子何齊嗣
哀帝建平二年益戶九百三十二平帝元始二年改殷公何
齊子安爲宋公安孔子十六世孫也是年六月丙午以二千
戶封孔子十六世孫褒成侯孔均奉孔子祠追謚孔子褒成
宣尼公均霸曾孫也王莽時以均爲太尉不就遂失侯光武
建武十四年均子志復得封爵而殷後孔安別爲漢賓

續漢百官

志

注時大禮以二王後二公及孔子後褒成君從也其閒若孔

永孔奮亦能自致官爵自元始時謚孔子宣尼公至北魏孝

文帝太和十六年改諡文聖尼父北周靜帝大象二年追封鄒國公唐太宗貞觀十一年稱先聖宣父高宗乾封元年賜太師武后天授元年追封隆道公元宗開元二十七年追諡文宣王內出王者袞冕被之迨後鄭縻又請於諡中加哲字宋真宗大中祥符元年議加至神元聖帝未行乃加諡元聖文宣王二年賜曲阜文宣王廟冕九旒服九章五年以國諱改元聖爲至聖神宗時判國子監常秩請尊孔子爲帝禮官李邦直議止之徽宗崇寧二年改用冕十二旒三年定名文宣王當紹興十二年西夏仁宗人慶三年尊孔子爲文宣帝止行於西夏元成宗元貞十一年加號大成文宣王明景帝

景泰三年劉翺請尊孔子爲帝憲宗成化時祭酒周洪謨請尊孔子爲文祖大成至聖皇帝常熟知縣楊子器請加配天廣運大成至聖萬世帝王宗師皆不行世宗嘉靖九年定稱至聖先師時徐階黎貫謂不宜去王號然不能爭也

以上世家及尊

號

先是漢明帝永平四年令學校祀周公孔子十五年躬祀孔子及七十二弟子躬祀用太牢學校秩禮牲以犬唐高祖武德元年立周公孔子廟各一七年以孔子配周公太宗貞觀二年升孔子爲先聖不祀周公而孔子仍居配位高宗永徽時復祀周公爲先聖而孔子以先師配顯慶時復稱先聖元宗開元二十七年祀孔子正南面至明嘉靖稱先師去上

號而仍南面

國朝順治二年國子監祭酒李若琳請加至聖先師爲大成
至聖先師不復言封號樂章景平有云猗歟素王非爵也其
神主與廟祀宋齊之制太子讀經通卽祀孔子北魏孝文帝
太和十六年親拜祭孔子於中書省明祀先聖於文華殿古
聖帝南面周公西面孔子東面其太學之禮唐元宗開元二
十八年詔國學春秋二仲上丁以三公攝行事宋太祖建隆
二年詔貢舉人就國子監謁先師著爲令其郡國廟梁武帝
天監四年梁始立孔子廟北齊文宣帝天保元年命郡學於
坊內立孔顏廟博士以下月朝之唐太宗貞觀四年詔州縣

學皆作孔子廟九年顏師古言郡國立學廟非禮當止高宗
咸亨元年敕州縣未立廟者速事營造自是孔子之廟徧天
下矣漢桓帝元嘉二年魯相乙瑛請置廟卒史明年事下春
秋饗祀出王家錢給大酒直永壽二年相韓敕修孔子墓及
禮器靈帝建寧二年相史晨請祀孔子依社稷出王家穀春
秋行禮以其禋祀皆立碑漢學校之祭共大酒太平御覽引
桓子新論云孔子匹夫耳而卓然名著至其冢墓高者牛羊
鷄豚而祭之下及酒脯寒具致敬而去魏書延興二年大金
國志大定二十六年皆制用酒脯則雜依民俗非秩禮也魏
帝芳正始二年使太常以太牢祭孔子於辟雍晉武帝太始

三年詔太學及魯國四時備三牲祀孔子唐元宗開元二十七年制國學以太牢用八佾州縣學以少牢元武宗至大二年制春秋二丁用太牢禮始定自漢文翁畫孔子像於蜀石室靈帝光和元年畫孔子及七十二弟子像於鴻都門學其後立廟遂係像唐元宗開元八年以十哲及曾子配饗皆坐像先是顏淵立像至是采論語四科九人及曾子配又畫七十子及二十二賢於廟壁明太祖洪武初國子監廟增木主司業宋濂坐謫官以其請毀像也憲宗成化五年闕里廟依京師制增木主英宗天順元年立孔子顏子曾子子思孟子銅像於文淵閣世宗嘉靖九年張璁議毀像簋豆用十樂用

六佾或依毀像或移像別作室奉之或亦不移不毀今闕里廟舊像也闕里廟漢世卽故宅興治桓帝元嘉二年置百石卒一人魏文帝黃初二年亦置百石卒史衛廟而於廟外廣爲室居學者宋孝武帝孝建元年詔建孔子廟同諸侯之禮北魏孝文帝延興三年給十戶供灑埽唐太宗貞觀十一年給廟戶二十睿宗太極元年以近祠戶三十供灑埽憲宗元和十三年置五十戶宋太祖建隆三年詔祭孔子廟用一品禮立十六戟於廟門眞宗天禧六年增殿庭廊廡百六十間仁宗慶厯四年以本縣中戶五十供灑埽嘉祐六年頒大成殿榜於闕里廟神宗熙寧二年行新法減省廟戶二十哲宗

元祐五年復之徽宗崇寧三年定殿名大成國學郡縣學皆同四年定門戟二十四元太宗九年給守廟一百戶世祖至元二年罷成宗大德五年復八年給灑埽戶田五十頃明太祖洪武元年置戶百世宗嘉靖八年改大成殿爲先師廟大成門爲廟門闕里廟祭以四仲上丁國子監府州縣學廟以春秋洪武十五年制也

以上祠廟

孔子墓周時諸生以時習禮其

下史記集解皇覽云孔子冢南北十步東西十三步高一丈五尺塋地百畝史記云葬魯城北泗上故所居弟子堂內後世因廟藏孔子衣冠琴車書守相出私錢治之宋文帝元嘉十九年給灑埽五戶唐太宗貞觀十一年給戶二十墓初祠

壇方六尺門弟子以瓴甃爲之漢韓敕易以石石廣厚三尺
縱橫各七唐元宗開元二十年遣禮部尙書以太牢祭孔子
墓易舊石以封禪石以近墓五戶長供灑掃後又廣新石五
尺宋眞宗景德四年置守塋二十戶大中祥符元年東封過
仙源拜孔子墓命學士晁迥奠孔子父母明太祖洪武時置
灑掃戶七成祖永樂二十年建聖林門以上墓其推恩追崇始

宋眞宗大中祥符元年封孔子父齊國公母齊國太夫人妻

并官氏鄆國夫人

并蓋覓弁之借唐人左傳桓六年正義宋人隸辨引家語正作并官

仁宗慶

歷八年詔於聖殿後立廟齊國公像用九章元文宗至順元
年封啟聖王啟聖王夫人三年封鄆國夫人爲大成至聖文

宣王夫人又封顏子父杞國公母杞國夫人順帝至元二年
杞國畫像九章明英宗正統三年以顏路曾皙伯魚從祀啟
聖王殿世宗嘉靖八年改王爲公薛侃上言聖廟中顏路三
人在廡四配理所不安或其時三人兩從祀歟

以上推恩

自襄成

侯至漢和帝永元四年定爲亭侯食千戶魏文帝黃初二年
改宗聖侯邑百戶晉武帝太始三年改奉聖亭侯邑二百戶
至宋孝武帝大明時奉聖亭侯失爵南朝亦詔求孔氏後北
魏孝文帝延興三年以孔子二十八世孫孔乘爲崇聖大夫
太和十九年孝文帝如魯祀孔子封孔靈珍爲崇聖侯邑百
戶齊文宣帝天保元年改恭聖侯周靜帝大象二年追封孔

子鄒國公以孫孔長孫襲邑百戶隋煬帝大業四年封長孫
子嗣哲紹聖侯食百戶唐高祖武德九年封嗣哲子德倫爲
襲聖侯太宗貞觀十一年詔襲聖侯食邑百戶位同三品中
宗神龍元年以鄒魯百戶爲隆道公後襲聖侯采邑元宗開
元二十七年隆道公爲文宣王襲聖侯進爵爲文宣公兼兗
州長史長任代不絕肅宗上元二年詔文宣公位二品文官
下憲宗元和二年赦敕與文宣公子一人官遂爲例昭宣帝
天祐二年朱溫專政失爵越二十八年唐明宗長興三年復
文宣公爵兼縣令則孔仁玉也先是仁玉父光嗣不得封仕
泗水主簿梁乾化中爲廟戶孔末所弑唐明宗誅末授仁玉

曲阜主簿旋爲令復公封宋初卒贈兵部尙書今孔氏稱爲
中興祖者也宋太祖乾德四年授仁玉子孔宜曲阜主簿後
襲文宣公眞宗咸平三年詔本道轉運使及州長吏待孔氏
爲令簿者以賓禮勿使庭趨仁宗至和二年改文宣公爲衍
聖公立孔氏知縣唐季及五代孔氏宗子顯者才爲令簿至
宋謂孔子子孫不使他族統治使文宣公兼攝曲阜令時孔
宗原當襲而議者言文宣非可爲子孫爵名乃改衍聖公而
別立孔氏一人爲知縣英宗治平元年詔勿以孔氏知本縣
襲封人不得遠去家廟初襲成侯在洛陽同文門有漢元嘉
三年碑云相瑛言襲成侯四時來祭事已卽去及唐天寶十

五年文宣公孔璣避亂之寧陵遂家焉後以兼曲阜令在曲阜今別立令故申言襲封人當依家廟而衍聖公定著仙源仙源者曲阜宋名也哲宗元祐元年改衍聖公爲奉聖公承爵者卽除寄祿官廩俸並視現在官給田畝考遷亦改寄祿官不領他職在故郡奉祀徽宗崇寧三年復爲衍聖公大觀三年敕孔子後常聽一人注本縣官令丞簿尉無定職金世宗大定二十年授衍聖公本縣令宋衍聖公孔端友南渡寓三衢六傳至孔洙入元而金別擇立衍聖公廢帝天德二年詔衍聖公俸格加於常品晉階承直郎章宗明昌二年以衍聖公四品階八品不稱超授中議大夫元太宗五年分縣尹

至定宗時衍聖公元措卒養弟之孫湏爲嗣後以族人誣湏
非孔氏子封中絕縣尹仍孔氏世襲官爲修廟致祭世祖至
元十六年宋亡十九年宋衍聖公孔洙至上都帝欲使襲封
讓於居曲阜世承祀者越十四年成宗完貞元年封孔治爲
衍聖公二年設知印官大德四年給衍聖公隨朝四品官俸
七年縣尹用衍聖公弟襲補自湏失封至治襲封中絕者四
十四年元文宗至順二年給衍聖公三品銀印順帝至正八
年以衍聖公爵與階不稱晉秩中奉大夫換二品銀印明太
祖洪武元年進衍聖公秩二品階資善大夫置掌書典籍管
勾司樂知印奏差書寫與孔氏世襲知縣七年改世襲知縣

爲世職知縣凡衍聖公官屬知印始元貞時奎文閣典籍始
元武宗至大二年司樂始元仁宗延祐六年餘皆明制也宋
徽宗崇寧二年詔孔氏選親族一人判司簿尉事爲族長明
太祖洪武七年賜孔庭族長龍頭藤杖主理家政永樂二十
二年仁宗卽位賜衍聖公正一品服景帝景泰三年改賜三
臺銀印帶服皆正一品列文臣班首神宗萬厯七年萬壽節
衍聖公入賀待以客禮不在文武班不與朝參二十二年賜
衍聖公長子公世子名號例惟親王世子年十五授二品冠
服以上世家言其祭田漢唐依官爵唐中宗神龍元年以鄒魯百
戶租稅供薦享宋眞宗大中祥符元年賜田百頃哲宗元祐

元年添給百頃八年又賜百頃金章宗明昌五年增祭田六十五頃屋四百間後又撥給地六十四畝有奇元成宗大德五年官置祭田二十頃九年以尙珍署田五十頃供曲阜林廟祭祀明太祖洪武九年賜祭田二千大頃分五屯四廠十八官莊成祖永樂五年賜滋陽田七十三大頃順夫湯沐田八十二頃以上祭田其給復先時有司酌復之唐高宗乾封元年詔賦役之事褒聖子孫合門勿事周世宗顯德五年抑爲編戶宋太宗太平興國三年詔復之元太宗九年詔復孔顏孟三氏子孫世世勿與明太祖洪武元年詔復三氏子孫大宗徭役英宗正統元年復聖賢後裔以上給復其奉祀以宗子主之

或幼與病則攝宋大中祥符元年文宣公孔聖佑年十一九年遷孔道輔知本縣主祠天禧四年聖佑年二十四襲封兼知縣金宣宗貞祐二年衍聖公元措赴京師弟元用攝祭

國朝衍聖恭愍公毓圻晚多病以子傳鐸攝祭傳鐸當襲雍正八年乞病卽以子廣圻襲嘉慶四年衍聖公憲培卒嗣子

慶鎔幼以本生父博士封公爵憲增攝祭十一年八月交代

以上奉祀其京邸始明成祖永樂二十二年太子仁宗賜也在東

安門外天子祭闕里會孔氏子孫始漢章帝元和二年大會

孔氏六十三人以儒者巾服見天子臨雍衍聖公率諸賢裔

觀禮京師始明景帝景泰元年

以上邸

其從祀配享曹魏黃初

時曲阜廟像二弟子執卷侍立

見水經注

元魏興和三年兗州刺

史李珽修廟修像以從陳蔡十子雕素其側青衿青領其在
祭典先時止以顏子配或亦拜七十二弟子北齊時郡學立
孔顏廟諸賢不與也唐太宗貞觀二十一年始以先儒左邱
明等二十二人配享元宗開元八年以十哲配二十七年增
十哲及曾子等六十七人公侯伯爵後唐明宗長興二年始
定七十二賢邊豆酒脯宋真宗大中祥符二年又追封孔子
弟子加左邱明等十九人封爵徽宗政和元年更定孔門弟
子封爵改犯先聖諱者至以宋人王安石封舒王升坐配享
金章宗承安二年升先賢先儒封爵元仁宗皇慶二年以宋

元儒從祀先是南宋自撤出王安石別以宋儒從祀至是及
闕里廟矣延祐三年定四配始者北宋及金元皆以顏孟配
位顏右孟左與孔子平列南宋度宗咸淳三年四月增曾子
子思爲四配東西配延祐時從之升有子子張宋朱子於殿
上合四科閔子以下爲十二位則定於

國朝也明世宗嘉靖九年去從祀公侯伯號分稱先賢先儒
熹宗天啟時以魏忠賢從祀後撤之

以上從祀

自宋仁宗慶歷三

年立尼山廟學教孔顏孟子孫哲宗元祐元年撥給近尼山
田二十頃元仁宗延祐二年改中庸精舍爲子思書院設山
長文宗至順元年加號顏子復聖曾子宗聖子思述聖孟子

亞聖明太祖洪武元年改廟學爲三氏子孫教授司立尼山
洙泗二書院山長又置灑埽戶八英宗正統九年設三氏學
生員景帝景泰三年置顏氏孟氏世襲博士孝宗宏治十六
年加衍聖公次子翰林院五經博士第三子太常寺博士皆
世職武宗正德元年立衢州孔氏博士以孔洙子孫世襲二
年以衍聖公次子博士主子思書院世宗嘉靖十八年立曾
氏博士於嘉祥神宗萬曆十五年三氏學益曾氏爲四氏學
熹宗天啟元年孔氏鄉試編耳字號聖裔聖字半也自子思
書院有博士子思始得專祠書院官置田子思書院博士
國朝順治十四年以明制太常寺博士襲其衢州西安博士

以西安孔氏襲松江青浦北有地名孔宅者言漢時孔氏避地居此有孔子衣冠墓康熙四十四年

聖祖仁皇帝南巡

親書扁聯賜之與衢州西安皆孔子後也五十八年八月衢

州歲科試定額外取孔氏童生入學二名

以上四氏博士

其諸州學

田宋眞宗乾興元年始詔給明英宗正統四年戶部奏準衍

聖公五屯存五百戶湊二千人辦納籽粒供祭祀其遣官祭

於曲阜始北魏獻文帝皇興二年遣中書令高允兼太常至

兗州以太牢祭孔子卽位告祭始元武宗至大元年卽位遣

學士祭告孔子顏子廟頒書籍始晉孝武帝太元十四年頒

六經於孔子廟避聖諱始宋徽宗大觀四年改瑕邱爲瑕縣
龔邱爲龔縣金章宗明昌二年改臣庶名孔子諱者曲阜孔
廟前立下馬牌祭版署御名太和五年詔進士名有犯孔子
諱者避之告成太學及曲阜廟則始

聖祖仁皇帝平三藩其立碑則始

平定朔漠爲民祈福則始康熙三十四年遣吳涵初

以上典制

世祖章皇帝順治元年定制一如明時交洪武二十五年八
月二十五日明太祖親封鐵冠道人圖匣於曲阜孔氏二年
加孔子號大成至聖文宣先師十四年定稱至聖先師孔子
聖祖仁皇帝康熙二十九年立天下文廟前下馬牌

世宗憲皇帝雍正元年封孔子五代肇聖王裕聖王詒聖王
昌聖王啟聖王啟聖王改啟聖爲崇聖祠二年

諭改幸學爲詣學增先賢博士三年定至聖諱字右加邑州
縣丁祭俱用太牢樂用八佾五年定八月二十七日至聖生
日齋一日禁止屠宰七年修曲阜廟殿及正門皆用黃瓦改
舊名宣聖廟爲至聖廟門戟二十有四八年設廟中孔氏執
事官四十員

高宗純皇帝乾隆元年國子監文廟亦易黃瓦二十一年改
曲阜知縣爲在外調補缺停孔氏知縣而增孔氏執事六品
官一先是執事四十員三品二人四品四人五品六人七品

癸巳存稿

卷九

九

雲石楊氏

八人八品十人九品十人均由藩庫給俸二十兩准監生應試至是又六品一衍聖公田在會典者田二千一百五十七頃灑埽戶百十五皆免稅課徭役者今實免稅課田一千二百五十六頃七十八畝其九百頃二十二畝或以爲曲阜城中地案明時五屯二千大頃不應有曲阜城中地山東通志則云四千二百二十二頃五十一畝疑係現存大頃一頃爲三頃計之餘俱汶泗泃洸淤浸也

仁宗睿皇帝嘉慶十四年十月以孔子祭田缺額九百頃諭山東查撥補還其廟基爲三百二十七畝五分林地合新增總二千九百四十一畝九分墓刻今仍題文宣王廟像王

冕服皆明以前法也林樹古物有年分繫牌宋書劉義恭傳
云鎮彭城時魯郡孔子舊庭有柏樹二十四株經漢晉其大
連抱有二株先折倒土人崇敬莫之敢犯義恭悉遣人伐取
父老莫不嘆息蓋取枯折二株爲材今廟樹林樹極蔥盛也
明天啟時耳字卷舉人二名魯藩占一名聖裔占一名順治
十四年二名俱歸四氏雍正二年增爲三名道光十一年孔
昭虔任貴州布政使其子憲恭應鄉試山東以列耳字號官
字號雙請

皇上以歸官卷則失專設四氏學本意

諭仍歸耳字專號孔氏之派今衍聖公慶字爲七十三世自

癸巳存稿

卷九

三

靈石楊氏栞

明以公彥承宏聞貞尙衍八輩遠近支屬依用天啟中衍聖公衍植又定十字曰興毓傳繼廣昭允慶繁祚及允憲之襲也

高宗改爲憲祥今俱依用憲字衍聖公府當廟東詩禮堂垣東詩禮堂

列聖詣廟講學處也康熙二十三年十二月丙子

聖祖詣

依訓本作詣字

聖

曲阜文廟至奎文閣下輦由甬道旁行

行三跪九叩首禮留曲柄黃蓋供廟廷四時享祭陳之

世宗憲皇帝依行九叩禮乾隆五十五年

高宗純皇帝八旬萬壽先期

親詣曲阜廟致祭雍正時曲阜廟災

世宗詣國子監大成殿祭奠告慰避殿減膳曲阜廟工成
欽差大臣衍聖公山東巡撫同奏慶雲見其後

高宗頒周器十於曲阜廟重排石鼓十於國子監廟熱河文
廟衍聖公京邸今在西安門外太僕寺街顏氏士爲七十世
曾孟亦用孔氏名曾氏毓爲六十九世孟氏傳爲六十七世
顏曾孟祭田會典皆四十五頃顏氏又自增祭田見曲阜縣
志共百一頃十畝六分八釐曲阜亦有僧道明有三聖祠正
統時諭禁之

國朝康熙三十六年衍聖公咨巡撫布政使撤毀乾隆三年

河南學政林枝春以三教堂佛居中聖人老子互爲左右請通飭毀之得

旨允行古時有所禱南北朝祭或以女巫妖覲淫進非禮殺牲鼓舞倡優俚狎北魏孝文帝延興二年詔禁之定其禮封氏見聞記儒教云唐時風俗婦人多於孔廟求子有露形登夫子之榻者元成宗大德元年制各官蒞任先謁聖廟以次謁諸神廟著爲令廟始嚴闕

國朝康熙二十五年直省武官協領

駐防

副將以上得陪祀四

十九年九月太原總兵馬際伯奏文臣皆得陪祭孔子武臣惟副將以上得陪祭請自今參將以下同城武弁得與文臣

一體陪祭於是文武皆得在列元仁宗卽位遣宦者祭告殿上風起兩廡燭滅臺下鐵燭檠入土尺餘皆拔明洪武時每月朔望遣內臣降香嘉靖九年罷之然內學堂上學散學皆拜孔子非典禮主祭也史記世家言極纖悉蓋情深文明其言世家記世祿也其名至當矣後人忽言孔子可世天下以史爲失例其說可怪嘆故復識世家言以後事如此道光十二年四月二十五日書

禁開礦

康熙四十三年部議江西崇仁大庾開礦奉

旨開礦事情甚無益於地方嗣後有請開採者俱不准行五

癸巳存稿

卷九

三

靈石楊氏榮

十二年奉

旨有礦地方初開時卽行禁止乃可若久經開採貧民勉辦
貲本爭趨覓利藉爲衣食之計而忽然禁止則已聚之民毫
無所得恐生事端雍正二年奉

旨今日有利聚之甚易他日利絕則散之甚難若招商開廠
設官收稅傳聞遠近以致聚衆藏奸則斷不可行也五年
諭又申言之謂何必諄諄以利爲言嘉慶四年四月御史據
民商呈奏請開邢臺銀礦奉

旨恭閱

世宗憲皇帝硃批諭旨於開礦一事深以言利爲戒不准行

五年大名請開鉛廠摺不發六年三月塔爾巴哈台金礦奉諭以無籍之徒聚之甚易散之則難於邊地殊有關繫嚴行封禁九月平泉州銅苗見請開廠

諭永遠封禁二十年四月

諭封禁都蘭哈拉鉛廠

田土

順治十六年天下田土五百四十九萬三千五百七十六頃四十畝乾隆三十一年七百四十一萬四千四百九十五頃五十畝零州縣衛田也口外屯田不計

旗地

順治元年十月戶部奉

諭凡近京各州縣民人無主荒田及明朝皇親駙馬公侯伯太監等凡歿於寇亂者無主田地甚多爾部概行清查若本主尙存或子弟存者量口給予其餘田地盡行分與東來諸王勲臣兵丁人等三年三月議定此項錢糧照數永免今據乾隆六十年田數內府三旗莊田一百二十七萬八千八百畝宗室莊屯田一百三十三萬三千八百二十七畝八旗滿洲蒙古漢軍給地一千四百零六萬六千八百六十二畝初以圈地賣與民人者雍正七年官爲取贖其官贖之田乾隆四年議許壯丁具呈領買其價銀以五年錢糧分限扣交壯

丁領買者限以五晌計三十畝其五晌之價上地銀四十八兩二等三十八兩三等二十八兩四等十八兩荒地十二兩四十四年定官贖地未經領買者官收租銀由直隸總督徵解爲歲終分賞八旗之用其旗地徵收雍正十一年定官地被災十分者免五九免四八免二七免一六分者不免地租銀每畝一錢五分私價自三錢五分至八錢其井田雍正時定以田百二十五畝公田十二畝五分廬舍十二畝五分私田百畝納公田租十二石五斗乾隆時改爲屯田每畝交一斗

農祭

先農壇之祭順治十年定於仲春亥日案六壬古式正月亥爲天倉梁天監時改用二月今法二月節猶日躔亥故用亥後改於三月雍正二年

耕藉三推畢又

加一推遂爲例乾隆三年依

成法四推又定制三月

耕藉與祭

先農同日往時以祈穀時祭不燔柴順治十七年定制

祈穀用燔柴禮乾隆八年初定

常雩禮歲舉行之雨澤或愆則禱

社稷三壇又不雨乃

大雩也至民間求雨止於叩禱此外皆治以應得之罪見雍
正二年六月十一日

諭旨民間祈求晴雨一事甚不合禮任意設壇觸犯鬼神聚
集不肖僧道妄行求雨殊屬非分如果欲求雨只宜各存誠
心叩禱而已何必種種作法嗣後除奉旨外或在寺廟誦經
求雨尚可如私自設壇借求雨之名妄作法術卽以妖言惑
眾治罪欽此農民宜知之交相告也

荒政

國家荒政十二一救災二拯飢三平糶四貸粟

收成在八分
以上加息七

癸巳存稿

卷九

三

連筠簞叢書
石渠氏集

分免息六分緩半五分以下緩災重者豐收亦免息

五蠲賦六緩征七通商

禁遏

八勸

輸過三百石奏獎

九嚴奏報之期十辨災傷之等十一興土功使民

就傭十二反流亡使民生聚會典拯饑之例水旱成災先給一月糧爲撫卹災六分者極貧予一月糧七分八分者極貧二月次貧一月九分者極貧三月次貧二月十分者極貧四月次貧三月凡月者皆滿三十日戶計口大口日米五合小口兩日米五合或給錢依米時價成戶者月一發不能自舉火者官給粥日一發士子移粟學宮就給其極貧加至七八月次貧五六月者事出

特恩其救災之例若水患民居湮漂者給修理費傷人者加

卹水旱興土功則以所濟民數與工費同報部康熙年賑山東賑喀爾喀乾隆年賑甘肅賑徐州嘉慶年賑直隸皆

曠典邁古乾隆時修會典凡涉民事刪去虛文歸於實惠俱高宗純皇帝丹毫改定親民重農遠過唐虞三代矣日下舊聞考五十五卷館臣案云乾隆二十年會典進

呈奉

御筆將先農壇齋宮改爲慶成宮此改定之見於記載者且丹毫牽絲鉤勒及單雙圈出擡寫式樣尤爲使歸畫一免復請之遲緩與煩也

禁殺牛

古殺牛之禁寬嚴不同淮南子說山訓云殺罷牛可以贖良馬之死莫之爲也殺牛必亾之數以必亾贖不死未有行之者矣高誘注云牛者所以植穀者民之命也是以王法禁殺牛民犯禁殺之者誅故曰必亾之數是漢法不得殺牛汜論訓云馬免人於難者其死葬之牛死葬以大車爲薦死而埋之其不殺可知後漢書第五倫傳云爲會稽太守有妄屠牛者吏卽行罰魏志陳矯傳云是時耕牛少殺者罪至死爲魏郡西部都尉曲周民父病以牛禱縣結正棄市矯曰此孝子也表赦之高堂隆傳云明帝時度支經用吏每不足牛肉小賦前後相繼以此爲賦所以有私宰之禁其言私者對官言

之也晉書張茂傳云初起義兵元帝辟爲掾屬官有老牛將賣之茂曰殺牛有禁又不任耕稼是以無用之物收百姓利也南史云梁傳昭子婦家餽牛肉昭曰食之則犯法告之則不可取而埋之唐律廢庫云故殺官私牛徒一年半盜賊三云盜殺者徒二年半其法似輕然唐赦文多曰十惡五逆火光行劫持刀殺人官典犯賊屠牛鑄錢合造毒藥不在原赦之限五代史唐莊宗紀云同光元年十二月十一日敕百姓將牛驢及馬宰殺貨賣便仰擒捉不問軍民高低隨在處斬訖奏明宗紀云天成二年三月丁卯詔糾察殺牛賣肉準條科斷其自死牛許賣斤不過五錢民家各報所由準例輸皮

入官宋則燕翼貽謀錄云淳化二年閏二月己丑詔曰開櫃

房屠牛馬驢狗以食犯者定行處斬青箱雜記云張詠尹益

都李順黨殺牛避罪以逸許首顧望就命斬之厚德錄云張

逸知益州歲饑民殺耕牛皆配關中明歲乃奏還之折獄龜

鑑鄭克

云包拯知揚州錢和知秀州有仇盜割牛舌者皆使

歸屠牛散肉遂爲仇所告以此獲仇盜王鞏聞見近錄云張

文懿爲社洪令村寺神每告僧迎之一日僧不出迎神言長

官誤斷殺牛事天符已下不復相矣文懿遂改正安南大越

史記李仁宗本紀云龍符二年八月詔盜殺牛杖八十徒犒

甲其妻杖八十徒桑室婦鄰家杖八十時當宋也並罪及其

妻明沈景倩野獲編云萬歷丙戌丁亥間巡城御史楊四知榜禁殺牛引太祖所定充軍例懸賞購人告發是殺牛自古有禁順治十一年五月甲午端午

上諭賜饌大臣曰朕甚憫耕牛勞苦不忍食其肉又序刻牛戒彙鈔既而大學士魏裔介又輯刊牛戒續鈔雍正七年六月

上諭曰聞外間譌傳六月二十四五將開屠宰耕牛之禁回民等將欲齊來謝恩又聞民間竟有私宰耕牛之事今朝廷所需惟祭祀照例供用其餘一概不用牛肉矣如有違禁私宰耕牛立即鎖拏按律盡法究治該管官從重議處嘉慶十

年十二月巡視西城御史奏請開牛禁坊官驗明准令回民宰賣

上責以此御史又非回教中人矢口亂道荒謬已極不可復任御史回教中聞之亦稍斂迹也回回殺牛者諉之老教實亦不然回教以駝爲大牲祭用之牛爲少牲祭與賓用之用者卽不以負知非耕牛也天方典禮引天方書云市有懸牛聖化不入天方衆國無以屠牛爲業者又云穆罕墨特至默底那見市屠牛曰盍易諸民遂舍牛而易羊大唐西域志云天竺噉牛豕者鄙恥衆所穢惡屏居郊外希迹人間今京城禮拜寺言回回禮拜日殺牛者不得升堂

演義小說

順治七年正月頒行清字三國演義此如明時文淵閣書有黃氏女書也黃氏女書爲念佛三國演義爲關聖一時人心所向不以書之真譌論其小說之禁順治九年題准瑣語淫詞通行嚴禁康熙四十八年六月議准淫詞小說及各種秘藥地方官嚴禁五十三年四月九卿議定坊肆小說淫詞嚴查禁絕板與書盡銷毀違者治罪印者流賣者徒乾隆元年覆准淫詞穢說疊架盈箱列肆租賃限文到三日銷毀官故縱者照禁止邪教不能察緝例降二級調用嘉慶七年禁坊肆不經小說此後不准再行編造十五年六月御史伯依保

奏請銷毀淫說如意君傳濃情快史株林野史肉蒲團等
諭旨不得令吏胥等藉端坊市紛紛搜查致有滋擾十八年
十月又禁止淫詞小說

官話

雍正六年奉

旨以福建廣東人多不諳官話著地方官訓導廷臣議以八
年爲限舉人生員貢監童生不諳官話者不准送試福建省
城四門設立正音書館十三年奉

旨展限四年乾隆二年弛其令令州縣與士民相見及教官
實心教導保薦時列入政績十年裁福建四門書館四十八

年通政司行文各直省本章土俗字字典所無難以繙清嗣後隨本音釋揭送內閣以便繙譯對音嘉慶十一年奉

旨上書房行走者粵東口音於授讀不甚相宜謹案詩書執禮孔子皆用雅言不用齊魯音而經史多有方言學者貴知之然必立一雅言爲之準而後方言可附類而通也

雜職儀衛

會典禮部儀制司儀衛云雜職竹板二無他物也凡輿馬文員則司道以下教職以上乘轎昇夫四雜職乘馬按宋張某白獺髓云王姓初任江右一尉多刻剝宴於市民家民齎尉司旗杖等訴其攜兵卒強盜宋史司馬池傳云知鳳翔岐陽

鎮巡檢夜飲富民家所部卒執之俾爲約不敢復督士卒而後釋其縛池捕首惡誅之巡檢亦坐廢王明清揮塵錄云其祖爲應城尉驗尸爪有血弓手持蓋者面有爪痕縛之訊治果然則其風久矣矣又周遵道豹隱紀談云縣尉下鄉擾人邇來尤甚京口人效古詩云雞鳴刺縣尉下鄉也其三章云雞旣烹矣鴨旣羹矣鑼鼓鳴矣縣尉行矣葉子奇草木子云廉訪分巡用巡尉司弓兵旗幟金鼓其音節則二聲鼓一聲鑼若解命盜犯人則巡尉用一聲鼓一聲鑼然則宋巡尉有旗杖有蓋有鑼鼓元巡尉有旗幟金鼓蓋明時裁之

宮中歲用

皇朝通考國用考云康熙二十九年查故明宮中每年用金花銀九十六萬九千四百餘兩今悉充餉又光祿寺送內所用二十四萬餘兩今止用三萬餘兩又木柴二千六百八十六萬餘斤今止六七百萬斤又紅羅炭一千二百八萬餘斤今止百萬餘斤又每年牀帳花毯輿轎等項二萬八千餘兩今俱不用

高宗純皇帝御製詩注云明季宮中歲用七十萬本朝康熙五十年閒省至七萬乾隆三十年三萬四十年二萬嘉慶十四年正月二十日

諭朕恭閱

癸巳存稿

卷九

五

靈石楊氏采

聖祖仁皇帝實錄內載前明宮中每歲用度金花銀九十餘萬兩光祿寺每年送內所用各項錢糧二十四萬餘兩每年柴炭等項又不下數萬兩康熙時大加刪減不及十分之一我

皇考恪守

前規益加儉約更爲減省朕一切宮中支用照乾隆年間舊例遵行罔敢稍踰

太監

順治初裁定內官額數

順治元年奉

旨內監原未贊禮何得混入朝班牙牌事宜著議奏

順治二年定例嗣後內監概不許朝參亦不必排班

順治三年定織造不差太監

順治十一年滿洲佟義與太監吳良輔交通佟義旣死吳良輔處斬定議置十三衙門裁內務府

順治十二年六月二十八日奉

上諭朕今裁定內官衙門及員數職掌法制甚明以後但有犯法干政竊權納賄屬託內外衙門結納滿漢官員越分擅奏外事上言官吏賢否者卽行凌遲處死定不姑貸特立鐵牌世世遵守欽此日下舊聞考鐵牌在內務府高四尺五寸

癸巳存稿

卷九

三

通鑑纂要
靈石楊氏栞

廣一尺九寸厚一寸

順治十八年

遺詔

祖宗創業未嘗任用中官且明朝亡國亦由委用宦寺是年
罷十三衙門以其事歸內務府

康熙十六年五月置敬事房設總管副總管

雍正元年定總管四品副總管六品隨侍等處首領七品宮
殿等處首領八品

雍正四年六月定正四品大總管爲宮殿監督領侍從四品
大總管爲宮殿監正侍六品副總管爲宮殿監副侍七品首

領爲執守侍八品首領爲侍監尋又定內官品級自四品至八品皆不分正從永爲定例

乾隆七年定

宮中現行則例凡內監官職以現今四品爲定再不加至三品二品以至一品

宮中現行則例歲賞內監廣儲司銀二千兩崇文門錢一千六百弗

皇朝通考職官考乾隆三十四年裁萬善殿教習清書太監在長房一帶以內府筆帖式課之漢書亦派筆帖式教習

高宗純皇帝御製詩三集蕉園詩跋若輩不過令識字記檔

癸巳存稿

卷九

三

靈石楊氏采

案而已

三十
六年

乾隆五十年六月初四日

上諭自行淨身問擬斬候之律永行刪除十七日刑部議奏
奉

旨以後投充者內務府大臣交該司盤詰驗看

都虞司

嘉慶十八年九月丙戌

上諭太監等充當差使等級懸殊凡近御者皆循謹誠樸之
人此案逆賊俱極疏賤僅於宮內看守門戶嗣後俱不得任
各處太監藉詞告假有不得不暫時給假者限以時刻必須
兩三人同行方准放出

奏摺文字體式述

康熙二十二年陝西奏平涼盜發明廢韓康王定王豕奉
諭凡云廢者必如高煦等有罪廢爲庶人然後可彼生爲藩
王誰廢之耶雍正七年三月

諭張大有本內有地效其靈語又前河工履歷中有河伯效
靈字樣彼時面加切責張大有一任無知幕客信筆妄書全
不留心檢點著嚴飭行四月

諭每見臣工奏章有山川效靈字深切不安屢經降旨申飭
今衍聖公賀本內仍用乾坤效靈字樣著更改另行繕寫具
奏五月又

諭通政司及大學士參奏此措詞之當審也乾隆五十一年二月

諭劉綦摺內許牧劉令字樣殊失對君之體申飭通諭嘉慶九年六月

諭安徽巡撫王汝璧題本內稱前巡撫張誠基爲張巡撫者屢見內閣票擬飭行著交部議處嘉慶十五年十月安徽學政萬承風奏任滿摺署銜內廷供奉

諭以書銜不合會典官職無此名目此官名之當慎也官名地名俗多用省文嘉慶八年明亮奏稱烏魯木齊提督爲烏提奉

旨申飭十一年七月陝西巡撫奏稱甘肅布政使爲蘭藩
諭交部議處仍傳

旨申飭是官名不當捏造也乾隆三十年

諭飭熱河稱熱多倫諾爾稱諾以後地名字面一概全寫嘉
慶二十年六月

諭飭順天府尹奏留委員於順天府地方補用稱爲留順實
屬簡率道光九年五月扎隆阿奏葉爾羌稱葉城阿克蘇烏
魯木齊喀什噶爾稱阿烏喀什三城奉

諭旨申飭是地名不宜省捏也乾隆五十年六月書麟片奏
河南柘城案內回漢二字

硃抹批云不可如此寫嘉慶九年十月兵部議處佛爾卿額摺內有滿蒙文滿蒙話數處奉

諭兵部堂官察議司官議處嗣後毋許率用省文致礙文義
十年四月又

諭飭禮部奏貢士名數滿蒙漢字樣蓋湊捏之文實難注目
乾隆四十七年十二月九卿議覆改經摺內有春禮孤經句
硃筆添出秋記二字

諭飭行五十二年二月浙江巡撫覆奏前摺硃車係滴硃車
脚併寫

硃批以後慎之毋爲俗幕賓所誤五十四年六月廷寄

上諭長麟摺內鄉約地保省寫約地殊屬不通一任幕友書寫慢不經心嗣後宜加意檢點嘉慶十九年二月烏魯木齊都統奏妒姦案姦婦爲達婦奉

諭不學無術永不准用此等字二十年六月熱河都統奏稱建昌竊犯回子爲回賊奉

諭申飭察議更正此皆捏寫不合者至其他文義乾隆五十五年十月

諭向來河臣以河身隄內灘地爲隄外以隄外民田廬舍爲隄內內外倒置嗣後總以河身爲主毋得牽混五十四年閏五月福建巡撫浦霖鹽摺

批云東牽西扯甚覺難明九月江蘇巡撫閔鶚元奏臬使來京

硃改來爲進廷寄

諭云閔鶚元誤寫未留心是年六月十八日穆騰額呈進與李天培通候信稿

諭云稿內語句虛文敷衍尤屬可鄙宜乎有此一驚也嘉慶二十四年十二月義州城守尉呈遞靈芝奏片係松筠代擬引爾雅茵芝釋曰土氣和作爾雅茵芝擇日上氣和又引本草氣味平作本草氣味乎

諭云特爲指示俾知盛世不尙祥瑞其率意稱引尤可不必

也嘉慶九年四月

諭題本年月末幅挖改蓋印著另換一扣粘接鈐印道光元年九月湖廣總督陳若霖奏到各摺內雨水糧價一摺

諭云並未封口殊屬疏忽著傳旨申飭十三年七月御史松桂奏息銀修理街道一摺

諭云並未填寫年月日著傳旨申飭敬悉所聞亦案牘中風雅嘉話也

工程圖式考

凡輿地懸圖宜以北爲上其几案展閱之圖宜以南爲上以坐閱多向明也乾隆五十一年十一月廷寄湖廣總督言奉

上諭武陵白沙隄工圖樣南北倒置不便閱看嗣後勿再舛錯蓋俗士作几案圖多誤從懸圖式也又一圖不能盡者當分圖又地要工多一圖叢記者當於全圖中聲明此處別展一圖乾隆四十一年五月南河奏挑湖口引河移下清口壩挑陶莊以上引河圖

批云將所圈處放大樣貼說來庶便觀覽嘉慶二年四月南河奏豐工大壩挑水壩圖大壩挑水壩偏在西首似河道西短窄東寬長不能一目了然

諭云工所酌中另繪一圖又河淮圖自應分別顏色乾隆五十四年閏五月兩江總督奏引河圖顏色同

批云可謂不用心之至六月覆奏分用顏色五十九年八月山東巡撫奏南河豐工攔壩圖奉

諭黃河隄工自應分爲兩色庶可一目了然乃一色繪畫竟似河流分爲二道眉目不清且不吉祥嗣後圖樣宜分別顏色嘉慶元年七月南河奏豐工圖

諭云正河下游旣已斷流仍用黃色繪畫仍欠明晰十一年六月南河

欽差奏圖奉

諭著將湖河情形另繪圖說分別青黃渲染著色以便披閱了然

癸巳存稿

卷十

三

靈石楊氏棻

癸巳存稿卷之九